

易

經

揆

一

易經揆一卷十二

臣梁錫璵集傳

說卦傳

繫傳釋彖文之義例爲詳。卦則畧言之而未竟也。故成列因重之蘊猶未明。而觀取之象猶未著。此則特說之也。

昔者聖人之作易也。幽贊於神明而生蓍。參天兩地而倚數。觀變於陰陽而立卦。發揮於剛柔而生爻。和順於道德而理於義。窮理盡性以至於命。

生猶創也。謂幽贊神明以出命而創蓍法也。德爲神明。體卽天地。天之生數一三五。參也。地之生數二四。

兩也。揲著一變。其歸扐之數。左三右必一。左一右必三。左二右亦二。總左右合掛一皆五。五除掛一爲四。所謂奇也。左四右亦四。左合掛一爲五。右合掛一亦爲五。總之則九九除掛一爲八。八者兩四也。所謂耦也。再變三變。左一右必二。左二右必一。總左右合掛一皆四。則亦奇也。左四右必三。右合掛一亦四。左三右必四。左合掛一亦四。總左右皆八。則亦耦也。奇耦由於一二三四而五亦寓焉。故曰參天兩地而倚數。夫掛出於分。扐出於揲。揲以四數之。扐亦以四計之。是子之生數應母數矣。三變而爲老陰。揲數二十有

四。扌數亦二十有四。皆六四也。其子之成數復應母數矣。老陽則揲數三十有六而爲九其四。扌數十有二而爲三其四。少陰則揲數三十有二而爲八其四。扌數十有六而爲四其四。少陽則揲數二十有八而爲七其四。扌數二十而爲五其四。其子之成數與母數不應。非不應也。陽主陰輔。故奇能兼耦。耦不能兼奇。三奇爲十有二。兼三耦之二十有四。則亦三十有六而爲九。一耦二奇爲十有六。兼二耦之十有六。則亦三十有二而爲八。一奇二耦爲二十。兼一耦之八則亦二十有八而爲七。老陰之六。用本數也。老陽之

九少陰之八少陽之七用兼數也。成數有十而著不取十。蓋揲之以四以象四時。土無專用也。五止見於初變而且除之矣。生不可泯。故五寓於一二三四之中。成無專功。故十化於六七八九之內。數之方行爲陰陽。陰陽運於自然。非可以有心與。故曰觀變。歷十有八變而卦以立。卦成有質曰剛柔。就其中有相推者而發揮之。而爻以生。和順者合而不拂。理者析而不紊。卦爻所陳其統體一道也。各有所得者德。極之萬變而各有其宜者義也。窮者探其蘊也。盡者踐其實也。至者達其原也。義所宜皆天下之理。德所具爲

人物之性。道所運卽天地之命。易之和順而理也。由本逮末而無缺。故人之窮之盡之而至之也。邇流得源而同揆。

右第一章

昔者聖人之作易也將以順性命之理是以立天之道曰陰與陽立地之道曰柔與剛立人之道曰仁與義兼三才而兩之故易六畫而成卦分陰分陽迭用柔剛故易六位而成章

窮理盡性以至於命。蓋以是理也卽性命之理也。繫傳言有三才之道依其位而次之。故人居天地之中。

此言立三才之道。由其生而序之。故人在天地之後。陰陽以氣言。剛柔以質言。仁義則人所命於天地之理。以爲性者也。天地無心。言氣質而理具焉。人有欲。賴理以宰此氣質而已。先陰後陽。先柔後剛。於對待之中。示闔闢之機。靜居動始。造化所以不息也。先仁後義。於對待之中。重統始之意。慈爲肅主。生意所以流行也。三畫上爲天。下爲地。中爲人。兼而兩之。則五上分爲陰陽。初二分爲剛柔。三四分爲仁義。乃人參天地。則陰陽剛柔皆仁義所體也。卦成有爻。經之者六虛。名之爲陰陽。緯之者老少。目之曰剛柔。與上立。

天立地異也。序相次而適均。其分也不可紊也。隨所
值而互推。其迭用也不可執也。成卦所以順性命之
理而盡其大。成章所以順性命之理而析其精。

右第二章

天地定位。山澤通氣。雷風相薄。水火不相射。八卦相錯。
數往者順。知來者逆。是故易逆數也。雷以動之。風以散
之。雨以潤之。日以暄之。艮以止之。兌以說之。乾以君之。
坤以藏之。

六畫成卦。卦何由生。生於大極也。大極生天地。故曰
先天也。蓋天氣也。其理則大極也。由混沌而開闢。復

由開闢而混沌。迎之無首。隨之無尾者。理以宰之也。今夫天定位於上。地定位於下。據定位之時。觀之山澤。自然通氣。雷風自然相薄。水火自然不相射。然此特數往也。數往順而知來逆。易主知來。故逆數也。繫傳曰。神以知來。知以藏往。蓍圓而神。蓍揲而奇耦。兆知來也。卦方以知。卦成而吉凶定。藏往也。是以蓍與卦分往來也。又曰。彰往而察來。蓍揲而卦成。往也。吉凶之未然來也。必彰其往之理。始可察其來之幾。是以占與事分往來也。此由定位之後而遯至相薄。則數往也。由相薄之始而計至定位。則知來也。是以卦

之微著爲往來也。然則此所謂來卽大極之生天地乎。大極判爲陰陽。由一陽之震二陽之兌三陽之乾陽積成天也。由一陰之巽二陰之艮三陰之坤陰積成地也。乃其始之一陰一陽有震巽之意而無雷風之聲。卽乾坤之初也。以方判而相薄矣。由是陽進上騰。陰重下凝。有艮兌之氣而無山澤之形。卽乾坤之中也。將近相薄者遠相通矣。迨陽極於上而天始開。陰極於下而地漸闢。則乾坤之成也。位斯定焉。然非天自天地自地也。陰麗陽而陽陷陰。有坎離之性而無水火之質。蓋乾中有坤坤中有乾。其性情相繫而

不可解。故不相射也。夫剛柔相摩而成圓圖之八卦。僅爲天之開。卽曰天地定位何也。蓋中五艮也。中十坤也。五依四。十依六。地卽隨天而成。至圓圖之因重爲大圓圖中函方圖也。所謂八卦相錯也。而方圖亦卽隨圓圖而相錯。故卽曰定位也。乃天地之體由震巽而始。天地之用亦震巽爲先。逆推其用與逆推其體一也。試以用言之。氣機之始其雷風乎。動則物萌。散則物舒。造就之能其水火乎。水沛爲雨。潤則物滋。火耀爲日。暄則物堅。功效之著在艮兌乎。止則物成。說則物遂。綱維之權則乾坤乎。君以統之而物有宰。

藏以容之而物有歸。造化由微至著。而人事象之。故
易闡其義。以前民用。所謂知來也。左爲生。右爲成。方
生方成。故舉象。旣生旣成。故取卦。數往水火居末。蓋
震兌乾陽體也。離以陰而麗陽耳。巽艮坤陰體也。坎
以陽而陷陰耳。知來則雨日居次。蓋離旣麗其用。已
與震相得。故陽氣之動。日隨而升。坎旣陷其用。卽與
巽相通。故陰氣之感。雨因而至。

右第三章

帝出乎震。齊乎巽。相見乎離。致役乎坤。說言乎兌。戰乎
乾。勞乎坎。成言乎艮。

此蓋天地既位而四時行也。故曰後天也。大極始分爲陰陽。既著爲五行。故先天五行渾於陰陽而居生。後天陰陽顯爲五行而乘王。先天木生未達。故震爲一而居下之左。火生未耀。故離爲八而居左之中。金生未凝。故兌爲三而居上之左。乾爲七而居上之中。巽與震同氣。乃爲二而居上之右者。震爲陽始。巽爲陰始。司闔闢之樞而相對。元之統天也。水生未流。故坎爲九而居右之中。艮本中五。坤本中十。乃艮爲四而居下之右。坤爲六而居下之中者。河圖左與上互連爲五爲十。右與下亦互連爲五爲十。由左而上爲

陽五十之氣順之而行。由右而下爲陰。五十之氣順之而凝。行猶未彰。凝則可見。故艮依四坤。依六而相次也。後天木王於春。震偏陽爲陽木。而應三。巽偏陰爲陰木。而應八。火王於夏。離陽中有陰。而應二。七。坤純陰爲陰土。而寄二。金王於秋。兌偏陰爲陰金。而應四。乾純陽爲陽金。而應九。水王於冬。坎陰中有陽。而應一。六。艮偏陽爲陽土。而寄一。木。金。土。各二。水。火。各一。坎離蓋五行之精華乎。故先天陰陽方判。而坎離在左右之中。後天五行司運。而坎離得上下之正也。震巽先天相對。而後天相次。蓋三畫成八卦。重之亦

兩其三。八其八。震巽應三八而專主於春。亦元之統天也。艮坤先天相次而後天相對。蓋木火陽也。木生火。火生土。火生於寅。艮即寄生於寅也。金水陰也。火生土而土主。土生金而金主。金主於申。坤即寄主於申也。五十之數。左與下不連。上與右不連。故土之陰陽於此分。然陰陽雖分而土質非二。由寅而午。離中陰納己。己寄申而水生焉。陽土得水而濡。即陰土矣。由申而子。坎中陽納戊。戊寄寅而火生焉。陰土得火而燥。即陽土矣。土無專用而無往不用也。兌乾相次居生。相次乘王。乃其生也。獨異焉。蓋己爲火位而金

已生於已。居克地而能生者。健而無息之義也。彼木豈能生申。火豈能生亥。水豈能生四季乎。卽艮土生寅。彼亦直寄焉。而非其本位也。先天之體。陰陽判而天地分。後天之用。五行運而天爲主。天之主宰則帝。帝卽天之主氣也。乃動散云云。非用乎。曰。先天對待相資。用猶含於體。後天流行主事。體卽隨乎用。故雷以動之。陽之見端也。震進至卯。戶之闢也。則曰帝出乎震。風以散之。主下一陰。陰之見端也。巽次於震。震爲反生。木之根也。巽爲長爲高。木之幹也。則曰齊乎巽。齊者主上二陽。非散之謂也。先天生數五。成數五。

體依位而並生。後天木生火。火生土。土生金。金生水。水復生木。用卽以次而相生也。日以昬之。由卯方出也。離上居午。遂炎上之性而無微不照。則曰相見乎離。奈陽外而中虛。發而不收矣。然收之妙用。離卽具焉。離納巳。卽坤也。坤以藏之。正位於下。廣而有容也。陰生午。歷未申而三陰用事。坤乘王矣。離以陽外而病其泄。坤以純陰而善於收。蓋乾鍾於金。迨火烈則金鑠。雖生幾不息。陽土附火。毓金於巳。然火盛金微。亦無由成其體。惟有坤。則克之中而生寓焉。火生土。土生金。順以相生。火遂柔。不至克金。金依坤爲申而

氣始收。則坤之代終以役帝也。故曰致役乎坤。兌以說之。陽長而挾陰上潤也。兌位酉。陰歛而含陽內凝也。則曰說言乎兌。乾以君之。正位於上。尊而有統也。由凝而漸實。乾體藏焉。然時至亥。純陰之時也。陽資陰而用之。而功斯成。必克陰而化之。而命斯立。則曰戰乎乾。出震生之始。戰乾生之本也。雨以潤之。由酉方下也。已下則陽歸於根。有勞而納之之意。則曰勞乎坎。蓋戰勝羣陰。勞瘁之餘。當慰勞也。奈陰勝而陽陷。收而不發矣。然發之妙用坎卽具焉。坎納戊。卽艮也。艮以止之。行之終而方止。時值亥也。寄生於下之

左。則止之終而將行。時值寅也。寅爲木。木生於水。而無土則根不立。有艮則生之中而克寓焉。木克土。土克水。逆以相克。水斯上。能以生木。木得艮爲根。而氣漸發。察之時令。至後倍寒。驗之晝夜。向曉復黑。如是而出之力始厚。卽逆以相克之意也。故曰成言乎艮。入之機轉於坤。坤順戢火之熱。出之樞握於艮。艮止攝水之寒。造化之用中和而已。先天體也。天位乎上。地位乎下。日明於東。月生於西。雷奮於地。風行於天。山鎮西北。澤聚東南者。其體也。後天五行遞王。以氣行耳。體未嘗變也。又卦有木象。木之由本而遞分者。

體也。後天震爲根之生。巽爲幹之達。離爲花之明。坤則花之謝。花去而子見爲兌。子實而體全爲乾。體成而氣內藏者坎也。氣足而質外堅者艮也。投地則又生根而爲震矣。以時異耳。體亦未嘗變也。蓋體卽有用。用不離體也。

萬物出乎震。震東方也。齊乎巽。巽東南也。齊也者言萬物之潔齊也。離也者明也。萬物皆相見。南方之卦也。聖人南面而聽天下嚮明而治。蓋取諸此也。坤也者地也。萬物皆致養焉。故曰致役乎坤。兌正秋也。萬物之所說也。故曰說言乎兌。戰乎乾。乾西北之卦也。言陰陽相薄。

也坎者水也正北方之卦也勞卦也萬物之所歸也故曰勞乎坎艮東北之卦也萬物之所成終而所成始也故曰成言乎艮

時行則物生故帝出而萬物出萬物氣稟於天質具於地故帝主時物言方時爲卯方則東時爲辰巳方則東南氣畢出曰齊物有質可見曰潔齊離爲明德莫盛焉而八卦之德可推矣明則相見於時品物咸亨曰皆相見時爲午方則南南面取諸離蓋嚮明而治其義爲大而八卦之所取可推矣艮坤皆地艮五爲生坤十爲成坤固包艮矣且地數始於二至十而

坤之質成焉。離納已而坤見西南不用十而寄二陰反其始。則陽消其亢。其功大矣。故舉象曰地也。對帝曰致役。臣道也。妻道也。對物曰致養。母道也。母終父事。養物卽以役帝也。時爲未申。方則西南而不言者。順承天而無專位。特夏秋之交。火生土而氣正王。致養之功莫盛於此也。時爲酉。方則西。兌不言方而言正秋。萬物之成時爲大也。時爲戌亥。方則西北。陰盛物消。故不言萬物。物之受剝者形。天之不已者命。故戰戰主乾而曰相薄。勵陽而儆陰也。坎稟天一。物之根。根有真精存焉。故舉象曰水也。曰地曰水而八卦

之象可推矣。時爲子。方則北。兌坎皆言正。兌說有各正之義。坎歸有保合之象。第時行於天。猶未固也。方應於地。正而固矣。時爲丑寅。方則東北也。帝之成。無終無始。而一氣不息。萬物則於此成。終於此成。始而萬變不窮。故連山首艮。而夏正建寅也。

神也者。妙萬物而爲言者也。動萬物者。莫疾乎雷。橈萬物者。莫疾乎風。燥萬物者。莫熯乎火。說萬物者。莫說乎澤。潤萬物者。莫潤乎水。終萬物始萬物者。莫盛乎艮。故水火相逮。雷風不相悖。山澤通氣。然後能變化。旣成萬物也。

帝之妙用則神。神則不物於物而妙於物矣。帝以獨運爲尊。兼貫八卦而乾其本宮也。神則乾坤合一。而六卦皆乾坤也。六卦有時。神則利用出入而無時。卦各有方。神則陰陽不測而無方。故不言時與方而舉象也。萬物非雷則樞靜。動者發萌啟蟄之意。非風則氣鬱。橈者吹噓舒展之意。非火則質柔。燥者炎赫暴炙之意。非澤則體虛。說者歡欣充滿之意。非水則根枯。潤者滋益培植之意。非艮則力薄。終始者篤實光輝之意。曰疾曰燥。以氣用也。曰說曰潤。以精養也。曰盛以形成也。山以鎮爲象。舉象則用不著。故卽取艮。

爲義也。而動而撓而燥而說而潤而終始。功用之速者妙也。莫疾莫燠莫說莫潤莫盛。功用之大者亦妙也。是知坎離本一也。故先天坎離列左右之門而不相射。後天坎已下離已上。然仍居對位。則相逮也。震巽本一也。故先天震巽居陰陽之端而相薄。後天震出巽隨。易其對位矣。然陽倡陰和。不相悖也。艮兌本一也。故先天艮兌據浮沈之會而通氣。後天兌始收艮將出。易其對位而仍通氣也。六卦本一也。卽乾坤也。乾坤本一也。故神也。惟神。故帝出入而變化。萬物出入而成也。能者元功獨運也。旣者已也。不疾而速。

也。又盡也。並育不害也。

右第四章

乾健也。坤順也。震動也。巽入也。坎陷也。離麗也。艮止也。兌說也。

卦兼先後天而義備。而其德可推矣。乾純陽。其性專一。其情直遂。健也。坤純陰。其性安靜。其情善承。順也。震下陽。其性振厲。其情果決。動也。巽下陰。其性沈潛。其情宛轉。入也。坎中陽。其性隱伏。其情深藏。陷也。離中陰。其性冲虛。其情因應。麗也。艮上陽。其性堅確。其情鎮定。止也。兌上陰。其性和洽。其情歡欣。說也。

右第五章

乾爲馬。坤爲牛。震爲龍。巽爲雞。坎爲豕。離爲雉。艮爲狗。兌爲羊。

卦以通德。亦以類情。蓋物之形皆有陰陽。其氣皆有消息。今且分卦以肖物。亦無不肖也。乾健而運。故爲馬。而可以致遠。坤順而厚。故爲牛。而可以引重。馬蹄奇。牛蹄拆。陰陽之數也。馬起先前足。卧先後足。牛起先後足。卧先前足。陰陽之用也。馬健喜走逆風。牛順喜走順風。陰陽之性也。馬鬣而善驚。牛角而善鬪。陰陽之極而變也。馬疾卧。牛疾立。陰陽之乖而反也。震

陽動陰下。故龍乘陽壯而奮。然善動要於能靜。故處於重淵之下。以潛其神。陽而陰用之矣。巽陰入陽下。故雞隨時晦而伏。然善入可與知時。故鳴於陽長之候。以妙其應。陰而陽用之矣。坎內陽外陰。豕則內剛躁而外污濁也。離內陰外陽。雉則內疏野而外文明也。艮陽止陰上。狗外剛能止物。內柔可馴畜也。兌陰見陽上。羊外柔可順驅。內很難強制也。又艮有時止時行之義。故狗之短喙者善吠。可用之守。長喙者善捕。可用之獵。天文七星爲馬。先天乾位也。漢中四星曰天駟。東壁北十星曰天廐。建星六星曰天馬。房爲

天駟爲天馬。則後天之乾坎震也。廣象所以言馬於三卦也。牛宿值丑。地闢之時也。東方七宿謂之蒼龍。震爲木而生於水。故先天陽生爲震。應龍之潛。後天震進至卯。應龍之躍。亢宿值辰。應龍之飛也。昴宿值酉爲雞。西方金也。巽爲木而位巳。而金巳生於巳。故雞卽屬金。金生於巳。王於酉。藏於丑。日行至丑。火迫金而不能藏。故雞鳴也。室宿爲豕。在後天乾位。金生水也。南方七宿爲鶉。赤鳳曰鶉。火禽也。雉亦火禽也。雉性介而色文。夏則尾光鮮。故謂之夏翟。應離之陽也。飛直如矢而不過丈。長三之。故高一丈長三丈爲

一雉。應離之陰也。日入酉。故胃宿爲雉。附於酉也。艮先天在戌。而婁宿爲狗。乃後天在寅者。狗蓋土畜。而依火以成體。故生寅而見戌也。鬼宿值未。土王生金。故羊有角而善鬪。金伏於土。故土怪爲羴羊。而西域土可生羊也。

右第六章

乾爲首。坤爲腹。震爲足。巽爲股。坎爲耳。離爲目。艮爲手。兌爲口。

遠取固卽物而存。近取亦反身而備。首會諸陽。尊而在上。腹藏諸陰。廣而有容。足下而動。股岐而伏。耳內

陷而實。居陰能聽。目外射而虛。資陽能視。手剛在外。握動止之樞。口柔上拆。具吐納之用。

右第七章

乾天也。故稱乎父。坤地也。故稱乎母。震一索而得男。故謂之長男。巽一索而得女。故謂之長女。坎再索而得男。故謂之中男。離再索而得女。故謂之中女。艮三索而得男。故謂之少男。兌三索而得女。故謂之少女。

易以道陰陽。卽以道名分。乾爲天而始物。父道也。坤爲地而成物。母道也。坤索乾而爲震。坎艮各分乾之一體爲男。乾索坤而爲巽。離兌各分坤之一體爲女。

初爲長。中爲中。末爲少。生之次也。然亦可以形言之。亦可以性言之。天地爲萬物父母也。親上者。得震巽之氣乎。親下者。得艮兌之氣乎。性皆偏而塞。惟人成位於中。得坎離之氣乎。乃性之得中者鮮。純者尤鮮。然人性爲貴。偏可矯之以歸於中。中可充之以底於純。父母曰稱尊之也。男女曰謂猶彼此相謂也。先父母後男女。先父後母。先男後女。尊卑有等也。萬物皆具男女。分而言之。各有長中少。則長幼有序也。統而言之。則成位於中者爲貴。人參天地也。父母男女長幼之道。惟人能盡。故倫必歸人也。八卦在先天爲一。

體在後天爲一氣。未有父母六子之名。至天地生萬物。則乾坤有父母之象。物皆分天地之體。則六卦有男女之象。是又後天之用矣。故釋彖爻。則可兼取諸象。以盡其蘊。若先後天卦。卽言父母六子。豈天地自然之法象。而化育一氣之流行乎。

右第八章

乾爲天爲圜爲君爲父爲玉爲金爲寒爲冰爲大赤爲良馬爲老馬爲瘠馬爲駁馬爲木果

取諸物。取諸身。取諸人倫。而卦象思過半矣。猶恐人未能觸類而長也。故廣之。乾積陽而爲天矣。天則圓

也。其體左右上下渾而無缺。圜而大也。其氣升降浮沈運而不已。圜而健也。其德元亨利貞環而無端。圜而神也。乃天固圜矣。在天成象者亦皆圜。卽成形亦有圜者。且凡物亦皆有一節之圜者。皆乾也。乾無不統爲君。資始爲父。亦惟天當之。乃居天位者亦皆有君道。乾道成男。男旣長亦皆有父道。君止仁。父止慈。仁卽元也。元爲生物之心。慈卽茲心也。乾德純粹精鍾於物則玉。乾體至剛而善變。鍾於物則金。乾九成金而居西北。乾之戰其金之剛乎。乾藏於亥而復於子。故陽挾陰而爲寒。因而結水爲冰。寒冰其坎乎。而

易經揆一

卷十二

言卦作

七

卽乾也。蓋靜專之氣也。乾極於巳而位於午。故陽明盛徵於色爲大赤。大赤其離乎。而卽乾也。蓋成象之著也。午宿爲馬。乾象之。坤亦象之。陰隱而陽淑則良也。陰促而陽舒則老也。陰肉而陽骨則瘠也。陰弱而陽強則駁也。巽爲木。木生於水。培於土。而火則木所生。故坎離艮各分木之一節。乃乾言果。將亦分木之一節乎。非也。蓋帝出乎震。乾之元也。卽有木象。特陽在下而未著。至巽之潔齊而木象斯成。然皆乾之用也。至亥而體立焉。其時木皆結實而肖天之體。亥該也。木末生果。果具全木之神。亦有該義也。乃木於夏

初卽有成果者。乾成於巳也。由巳至亥。則萬寶皆成也。果著木。似日月星著天。其體圓而數繁者相類也。坤爲地。爲母。爲布。爲釜。爲吝嗇。爲均。爲子母牛。爲大輿。爲文。爲衆。爲柄。其於地也爲黑。

坤積陰而爲地。其資生則爲母。亦惟地當之。乃坤道成女。女旣長。亦皆有母道。坤順而廣。故東西南北經緯順成者。地也。而布亦似之矣。坤虛而容。故方圖坤倚乾而成六十四卦。地無不容之象。而釜亦中虛而容六十四升。數相符焉。金玉質本自貴。成象之乾也。布釜待人成用。效法之坤也。坤性歛。故爲吝嗇。坤之

德合无疆。故爲均。又布爲宣布之意。似春。坤之順天時行乎。釜則熟物而化之。似夏。坤之含物化光乎。吝嗇。似秋。坤之後得主利乎。均從土而有平與徧之義。似冬。坤之至靜德方乎。吝嗇非美。似有不足之意。然非不足於地也。人性似之。或有非所當歛而歛者。故微示其意。以爲人儆也。坤順而生。生相繼。故不僅爲牛。而且有子母之象焉。乾取其老而健。坤取其壯而生。老則不生矣。坤方而載。爲輿。承乾而無不至。則大也。奇實爲質。耦虛爲文。文以附質。乾主而坤輔也。乾以一施。坤以耦應。隨物賦形。故衆也。天與地本一體。

其精見於天者其質皆具於地。地卽天之柄也。坤有爲而代終。萬物倚之爲命。又物之柄也。地雖坤之本象。而先天坤以中而依北。故中爲黃。極爲黑。日在虞淵也。月行黑道也。死而成魄也。火之燼。澤之汚。草木之腐。皆黑。陰之極也。陰極陽生。故貞起元。晦生明。黑墳之土。土之美者也。

震爲雷。爲龍。爲玄黃。爲萑葦。爲大塗。爲長子。爲決躁。爲蒼筤竹。爲萑葦。其於馬也。爲善鳴。爲馵足。爲作足。爲的顙。其於稼也。爲反生。其究爲健。爲蕃鮮。

震下陽。故其氣藏奮於地。而爲雷。氣鍾爲物。則龍。彼

蛇脫皮。鹿脫角。龜脫殼。皆物之靈者也。龍脫骨。則靈之至矣。然其初猶水獸耳。迨養已至。渣滓盡化。亦惟純陽之氣。其蟄奮卽隨氣機出入。而與造化同功。神龍能爲雷也。震爲剛柔始交。故兼天地之色。而爲玄黃。蓍布也。又花之通名。震主春。而物應之。則草木之始生。而爲萌之布也。木之向榮。而爲花之開也。帝出而萬物出。故爲大塗。天開於子。震陽亦生子。易男曰子。同體於父也。又帝出乎震。於人爲君。長子卽爲儲君。有傳正統之道。其宅於東宮。蓋取諸此也。震得乾之剛。而未純爲決。或且爲躁也。玄黃雜而成蒼。竹之

材美曰簀。震下實上虛。故爲蒼簀竹。萑早荻。葦水蘆。與竹同而被堅此脆。蓋震之廢氣也。性本善而不能皆純。所以人貴復性之功也。質相似而不能皆美。所以人須變化氣質之學也。震坎分乾之用。亦曰其於馬。馬以下爲用。震雖未純而得其用矣。坎陽在中。美惡兼焉。艮已極。失健行而爲噬嚙之末。故無取也。氣陽也。形陰也。氣軋於形則鳴。然惟陽在初則善也。試觀雷動於根。一震而蟄啟。言由於中。一出而人服。陽下起。象馬之一足懸而鼻。陽下動。象馬之前後足並舉而作的。從白。陽色也。震陽雖在下而陰不能阻。旣

發於聲。亦徵於色。故爲的顙。震應春作。故言其於稼。
震爲剛反。穀旣成而復種於地。其下穿爲根。然後上
出爲萌。凡草木皆然。獨於稼言之者。反生不已。人民
所以育。故重言之也。震之究。純則爲乾之健。反則爲
巽之蕃鮮。蕃鮮卽潔齊也。

巽爲木爲風爲長女爲繩直爲工爲白爲長爲高爲進
退爲不果爲臭其於人也爲寡髮爲廣顙爲多白眼爲
近利市三倍其究爲躁卦

巽下陰而上二陽。故由曲而直爲木。由鬱而散爲風。
巽得坤初。故爲長女。巽德之制。故爲繩直而制木之

曲。爲工而制物之宜。繩之用在於柔。工之能成於巧。可以知行權之妙矣。巽先天位西南。陰之始也。卽後天金位也。至後天位東南。則金所生也。巽所以繫先庚也。故從其色而爲白。凡勢激者不久。暴發者必折。巽一陰伏二陽之下。故其行以舒而能遠。不求長而長也。其進以漸而能上。不求高而高也。巽下耦。故見於跡者有兩端而爲進退。巽內柔。故出於心者難立。斷而爲不果。得其道則爲擬議。以成變化。失其道必至優柔。以失事機。視所用而未定也。震陽發爲聲。巽陰蘊爲臭。聲有宮商角徵羽。臭有羶焦香腥朽。巽下

似坎。坎血爲髮。上剛則散。故爲寡髮。巽上似乾。故上豐而爲廣顙。後天巽離相次。巽雖潔齊而未明。位東南而不中。故黑睛下而爲多白眼。巽於先天爲由亨而利。後天則依離而爲日中之市。伏則善藏。入能識機。故本小末大有三倍之利。特曰近利。非溺於利也。苟由初而麗於中。則爲戈兵而爭起。再進而窮於上。則爲毀折而害至。可爲逐利之戒矣。巽究爲震。則躁夫進退不果者。將恐疑所不當疑。躁則又恐決所不當決。蓋剛主於內。其究則善。陰伏於內。其究不善。是以鬱而生躁耳。惟克己斯善變乎。巽究不言坤。從陽

也。

坎爲水爲溝瀆爲隱伏爲矯輳爲弓輪其於人也爲加憂爲心病爲耳痛爲血卦爲赤其於馬也爲美脊爲亟心爲下首爲薄蹄爲曳其於輿也爲多眚爲通爲月爲盜其於木也爲堅多心

坎陽陷於陰。陽德能潤。陰陷則下。故爲水。又坎本坤體。中陽爲水之流行。外二陰卽地也。故爲溝瀆。雜卦曰巽伏。陰之伏也。繫傳曰巽稱而隱。陰在下故隱也。此則陽之隱而不見。伏而不出也。物有剛柔。各適其用而不相通。坎中剛外柔。柔不至屈而可矯使直。剛

不至折而可輶使曲。弓輪者矯輶所成。弓發矢以禦侮。輪運車以行遠。矯輶之功大矣。隱伏陽之善藏其用也。矯輶陽之善變其質也。雖然。隱伏而至匿其情。矯輶而遂喪其質。恐未善矣。不可不知也。兌秋爲愁。坎冬也。故爲加憂。又震陽在下爲恐。坎陽在中而陷。亦加憂也。又乾爲惕。坎次乾。亦加憂也。加憂則過矣。坎臟爲腎。離臟爲心。腎生血。心藏血。坎離交也。有孚則心亨。坎得其道而其應在心也。加憂則心病。坎失其道而其應亦在心也。腎竅爲耳。加憂傷腎則耳痛也。然則心病而不知其由。耳痛而不知其本。可乎。坎

水行地。在身則爲血。乾爲大赤。至冬則赤含於黑而
玄。坎中陽卽乾故赤也。脊者外體之中。中剛外見而
美。心者內臟之中。中剛內蘊而亟。前畫柔故爲下首。
下畫柔故爲薄蹄而行且曳。坎似坤爲輿。中滿而外
不能承故爲多眚。蓋坎爲勞卦。心病耳痛亟。心下首
薄蹄曳多眚皆勞象也。剛中必達故爲通。內陽含明
故爲月。月卽天之水平。故陽燧可取火於日。方諸可
取水於月。而潮汐之消長隨月。水族亦多應月也。水
以潛爲用。故爲盜。然外有盜。內亦有盜。天地之精泄
之於水。人之精泄之於知。天道保合於貞。聖人退藏

於密所以完其精也。剛中故於木爲堅多心。

離爲火爲日爲電爲中女爲甲冑爲戈兵其於人也爲大腹爲乾卦爲鼈爲解爲羸爲蚌爲龜其於木也爲科上槁

離外陽盛故炎上而爲火。火緣物以爲體。故麗天爲日。陽火也。麗雲爲電。陰火也。日出於東。電發於雷。木生火也。日屬離。月屬坎。陰陽之精互藏其宅也。得坤中陰爲中女。陽堅外捍爲甲冑。火燄上趨爲戈兵。離爲文明而有甲冑戈兵之象。金伏於夏也。故夏官爲司馬。而有文事者不可忘武備也。人而陽外盛爲大

腹蓋疾証也。與坎之心病耳痛同也。火燥故爲乾卦。鼈性靜。得柔內之氣居多。蟹性躁。得剛外之氣居多。羸形銳。近蟹之躁而善麗。蚌中虛。近鼈之靜而含明。龜則質備文明。體含神知。爲甲蟲之長。甲蟲皆甲冑類也。乃離物而爲水族。坎離之既濟乎。水生木。土培木。故堅木生火。故科。科中虛也。上必槁矣。

艮爲山。爲徑路。爲小石。爲門闕。爲果蓏。爲闔寺。爲指。爲狗。爲鼠。爲黔喙之屬。其於木也。爲堅多節。

艮陽上。故爲山。震陽始出。闢於地之卑。而爲大塗。艮陽上窮。窘於地之高。而爲徑路。巨爲山。微爲小石。然

則觀象者。惟其時物。不可泥也。上實下虛爲門闕。通其出入。而有時止時行之義焉。植生之子爲果。蔓生之子爲蓀。艮陽本乾陽也。故亦爲果。艮體本坤體也。故又爲蓀。艮爲坤之剛。蓀猶爲蔓之剛也。專草木之始。果蓀草木之終。終則有始矣。閤守門。譏其出入而爲之啓閉。寺守巷。相導出入之事而糾之。亦時止時行之義也。手之止物。其用在指。指卽手之杪而多節者也。狗以止爲用。鼠坎象也。乃將旦則止。卽爲艮象矣。狗噬以牙。鼠嚙以齒。鳥啄以喙。皆剛在上也。黔雜青黑。東北之間色。鳥喙多黔。不可枚舉。故以之屬概。

之。剛在外而不中。故於木爲堅多節。

兌爲澤爲少女爲巫爲口舌爲毀折爲附決其於地也爲剛鹵爲妾爲羊

兌爲坎下塞故爲澤。得坤之末故爲少女。兌德爲說故爲巫。兌象爲口。然能言者舌。外耦而內奇也。震主生爲萑。兌主殺爲毀折。震陽將上通故爲決躁。有所去以達其怒也。兌陰將內歛故爲附決。始雖親而終離也。正秋之時。彙穰之餘則毀折。果蓏之屬則附決。又陽動至艮則止。陰疑至兌則決。艮兌爲陰陽之末。皆與地爲體。然山猶地之隆。澤在地之下。故言其於

地也。下塞則剛。陰見爲鹵。鹵不生物。潤在外也。故液之餘爲汗。汗出則涼。水之餘爲澤。澤鍾則死。又時至秋。露變爲霜。地在西。水凝爲鹵。坎以潤其根而生。兌以說乎外而死。其在於心。安樂者死之機。憂患者生之道。其在於人。脂韋獻媚。實誘我以死。勤懇納誨。將翼我以生。然則加憂雖過。君子有取焉。剛出金。兌之本體也。鹵出鹽。兌之化氣也。女少而賤。或從姊爲娣。或給使爲婢。皆妾也。艮兌皆末。然陽大陰小。陽舒陰促。故艮多成終成始之象。而兌象多末。口舌者行之末。金者利之末。鹽者食之末。妾者女之末。艮之闔寺。

亦使令之末。閹寺與妾世不能無。然人微而易暱。特著其象。其有憂患乎。外柔內狠。故爲羊。廣象於遠。取八物。乾馬特詳。且通於震坎。以明其異焉。坤牛則明其生焉。是知八物皆有異。皆有生也。震龍艮狗兌羊。復直舉之。巽雞坎豕離雉。則畧之。蓋南方多變化。坎離則互藏。亦多變化。故畧其本象也。龍尤善變。而直舉之者。他物變多不復。龍仍復其本體也。近取八體。震足言作言鼻。表其能也。於艮不言手而言指。於兌言口而兼舌。表其用也。是知八體各有能。各有用也。首不言於乾而於坎。言下首。腹不言於坤而於離。言

大腹。目不言於離。而於巽言多白眼。坎之薄蹄。亦足之類也。蓋皆非其本象而不善矣。乃坎言耳痛。是本象亦有不善。不可不知也。股不再舉。蓋隱伏於下。隨足爲用。無甚輕重。故畧之也。於人倫。則天父地母。復舉之。尊所生也。男則舉長。而畧中少。重嫡也。女則長中少。復並舉。且言少之爲妾焉。欲樛木下逮。雖賤不遺也。然重嫡者。父道也。中少固當凜天顯之義。長亦不可不念鞠子之哀。逮下者。妻道也。君子則不可不重窈窕之配。小星不可不矢在公之心。舉一隅而互見也。凡物合乎卦。則正言之。卦不足以盡物。則節取。

之如其於馬其於稼其於人其於輿其於木之類惟
乾無所不包故無所言。坤復言其於地蓋下爲本位
也。巽言躁卦蓋不言卦無以見其變震也。坎言血卦
血內藏故表之也。離言乾卦恐其混乾也。震巽爲陰
陽之始而言究然亦可例他卦。且言究亦可概中也。
廣象凡一百一十二然亦舉一隅耳。求之於經不盡
合者。廣象止取於成列。彖且取於因重。如卦名井鼎
小過卦辭飛鳥之類是矣。爻又取於變化。乾六龍之
類是矣。且有通象焉。乾爲馬而坤爲牝馬。坎爲雲而
小畜上巽爲密雲之類是矣。且有互象焉。震二九陵

渙四有邱之類是矣。且有時物之象焉。坤初霜冰剝。上碩果之類是矣。且有分象焉。大畜之三言良馬。四應初分乾初爲童牛。五應二分乾二爲豮豕之類是矣。且有隨爻位而成之象焉。咸之拇至輔頰舌之類是矣。將廣不勝廣。在觸類而長之耳。卦象本於造化。遍於庶物。著於人倫。而皆備於吾身。反身而誠。則踐形卽以盡性。親親長長而天下平。天地可位。萬物可育。用之道濟。則化無不宜用之制器。則用無不利。用之卜筮。無往不可以通物情。該事理。而百姓與能矣。

右第九章

易經揆一卷十三

臣梁錫璵集傳

序卦傳

序卦者。依文王所次而明其序也。邵子以先天屬包犧。後天屬文王。但後天艮居寅。卽連山首艮。夏正建寅之義。非屬文王明矣。今觀繫傳言包犧作卦之由。合之說卦所陳卦位卦運卦德卦象。似先後天均屬包犧。蓋仰則觀象於天。俯則觀法於地。觀鳥獸之文。與地之宜。非卽天地定位。與帝出乎震。及萬物出乎震云云乎。近取諸身。非卽乾首坤腹云云乎。遠取諸物。非卽乾馬坤牛云云乎。以通神明之德。則乾健坤

順云云者其義也以類萬物之情則首腹馬牛父母
六子其象也惟廣象所取不盡出包犧之世然非其
所取者亦其所類也蓋夫子因而廣之耳故說卦者
說犧卦也序卦者序周易也先天卦以摩盪而成極
之所生生則渾然一體後天卦則迭王用事帝之所
貫貫亦渾然一氣至周易而上下分篇變乎犧卦矣
犧卦以八卦立體而相錯周易上篇以體包用而乾
坤坎離居首尾下篇以用包體而震艮巽兌居其中
又變乎犧卦矣犧卦以反體相對周易仍之者八卦
餘卽以翻爲對又變乎犧卦矣然上篇首乾坤卽天

地定位也。下篇首咸次以恆。卽山澤通氣。雷風相薄也。上篇終坎離。下篇終既未。卽水火不相射也。與犧卦未始少異也。夫包犧畫卦而列聖遞衍之。後天圓圖神農本之爲連山。先天方圖黃帝本之爲歸藏。先天圓圖文王本之爲周易。連山明人道。歸藏明地道。周易明天道。天道善變。故曰易。乃夫子贊周易而語顏淵之問。爲邦則取夏時。蓋易以道陰陽。首乾則有統時以達王事。建寅則得令。所以損益百王而爲集大成也。

有天地然後萬物生焉。盈天地之間者唯萬物。故受之

以屯屯者盈也屯者物之始生也物生必蒙故受之以
蒙蒙者蒙也物之穉也物穉不可不養也故受之以需
需者飲食之道也飲食必有訟故受之以訟訟必有衆
起故受之以師師者衆也衆必有所比故受之以比比
者比也比必有所畜故受之以小畜物畜然後有禮故
受之以履履而泰然後安故受之以泰泰者通也物不
可以終通故受之以否物不可以終否故受之以同人
與人同者物必歸焉故受之以大有有大者不可以盈
故受之以謙有大而能謙必豫故受之以豫豫必有隨
故受之以隨以喜隨人者必有事故受之以蠱蠱者事

也有事而後可大故受之以臨臨者大也物大然後可
觀故受之以觀可觀而後有所合故受之以噬嗑嗑者
合也物不可以苟合而已故受之以賁賁者飾也致飾
然後亨則盡矣故受之以剝剝者剝也物不可以終盡
剝窮上反下故受之以復復則不妄矣故受之以无妄
有无妄然後可畜故受之以大畜物畜然後可養故受
之以頤頤者養也不養則不可動故受之以大過物不
可以終過故受之以坎坎者陷也陷必有所麗故受之
以離離者麗也

右上篇

有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯夫婦之道不可以不久也故受之以恆恆者久也物不可以久居其所故受之以遯遯者退也物不可以終遯故受之以大壯物不可以終壯故受之以晉晉者進也進必有所傷故受之以明夷夷者傷也傷於外者必反其家故受之以家人家道窮必乖故受之以睽睽者乖也乖必有難故受之以蹇蹇者難也物不可以終難故受之以解解者緩也緩必有所失故受之以損損而不已必益故受

之以益益而不已必決故受之以夬夬者決也決必有
所遇故受之以姤姤者遇也物相遇而後聚故受之以
萃萃者聚也聚而上者謂之升故受之以升升而不已
必困故受之以困困乎上者必反下故受之以井井道
不可不革故受之以革革物者莫若鼎故受之以鼎主
器者莫若長子故受之以震震者動也物不可以終動
止之故受之以艮艮者止也物不可以終止故受之以
漸漸者進也進必有所歸故受之以歸妹得其所歸者
必大故受之以豐豐者大也窮大者必失其居故受之
以旅旅而无所容故受之以巽巽者入也入而後說之

故受之以兌。兌者說也。說而後散之。故受之以渙。渙者離也。物不可以終離。故受之以節。節而信之。故受之以中孚。有其信者必行之。故受之以小過。有過物者必濟。故受之以既濟。物不可窮也。故受之以未濟。終焉。

右下篇。○序有義。既詳於卦矣。總其大致有二。相得爲用。相承爲次。乾坤天地也。相得爲用也。故不言受。咸亦不言受。人參天地也。亦相得爲用也。不於屯言之者。物之初生。人尚混於物。人之有倫。人始別於物。上下分篇。蓋以此也。乃上篇諸卦亦言人事。下篇諸卦亦言天道者。上篇以體包用。天地貞觀之運也。人

惟盡法天之事。下篇以用包體。天地繁變之氣也。人
宜有贊天之功。則上篇重天道。下篇重人事矣。然天
人非有二道。故上篇坎離居後。而下篇既未居終。蓋
坎離爲天地之樞體。具於上而用貫於下。人事莫非
天道所統。故離不言終而未濟始言終焉。則上下究
屬一體也。餘卦相承而相承之中義復不同。乾坤受
以屯。相繼者也。屯受以蒙之類。相因者也。蒙受以需
之類。相濟者也。泰受以否之類。相變者也。否受以同
人之類。相治者也。革受以鼎之類。相用者也。其大較
如此矣。而卦體則有對。有生。有翻。有反。乾坤爲對。有

乾坤始有屯蒙。有屯蒙始有需訟。以至有中孚小過。始有既未。則爲生。屯而爲蒙。需而爲訟。以至既濟而爲未濟。則爲翻。頤大過坎離中孚小過則爲反。然乾坤非相反歟。頤大過坎離中孚小過非相對歟。乾坤體也。相反之義可畧也。坎離非體之純。頤大過中孚小過又四偏之合。其相對卽爲相反。故皆言受也。夫易首乾。迨周有天下。卽取首乾而建子。傳固未暇及也。而繫傳取九卦脩德。亦卽本之序卦。是知其用無方也。至卦之序。傳雖具言其義。尚未明著其象。先儒因有推言之者。謹擇其善而聊參管見。以存其槩。上

篇首乾象天之開。次坤象地之闢。天地位。則乾居首
爲主以倡。而坎出用事。屯下震上坎。蒙下坎上艮。陽
由初而進於中。又由中而達於上。蓋卽分乾之三陽。
屯蒙所以繼乾坤也。三陽獨坎用事者。坎得乾中也。
坎象水。天一生水也。屯之雲。資雷之鼓。以興蒙之泉。
依山之靜以出。震艮蓋坎之輔乎。需訟則坎合乾。水
之升降於天也。師比則坎合坤。水之隱見於地也。坎
隨乾爲氣之化。故先上而後下。坎依坤爲形之流。故
先內而後外。小畜履則巽兌合乾而陰始萌。天之運
周矣。巽上散而密雲不雨。兌下塞而川壅爲澤。而水

之運亦周矣。泰爲天地交。否爲天地既交。天地合。則坤居中爲主。以和而離出用事。離得坤中也。離象火。地二生火也。震艮爲坎之輔。則巽兌亦離之輔。乃坎初出則偕震艮。而離初出不偕巽兌者。坎本坤陰。而得乾中陽。陽爲陰主。雖陷陰而能用陰。遂化陰質而流。故坤靜而坎動。而屯蒙之坎。卽偕震艮之偏陽。以分天之功。離本乾陽。而得坤中陰。陰爲陽用。始出必依陽。而資陽氣以明。故乾上而離亦上。而同人大有之離。不偕巽兌之偏陰。而惟隨乾以宣天之化。然乾坤實一體而分。坎離亦一氣而出。震艮爲坎之輔。而

震下似離。動則生明。艮上似離。止則藏氣。巽兌爲離之輔。而巽下似坎。飄而爲雲。兌上似坎。瀦而爲澤。故屯蒙爲坎之始。而離已寓。小畜履爲坎之周。而離亦出。乃坎之出六坎相繼。離之出止。隨乾而見何也。麗天之火。日也。用莫大焉。電發於雷。燧鑽於木。燄擊於石。亦微矣。謙豫則震艮合坤。震艮猶坎之輔也。火之諸象方兆而未具。隨蠱則震艮合巽兌。巽兌斯離之輔矣。火之諸象已具而未著。臨觀則巽兌合坤而爲純陰。地之用全矣。而離之用亦全矣。自此以後。坎離將遂各成其體。坎離之方出也。皆以震艮爲端。巽兌

爲委。坎離之成體也。亦以震艮爲端。巽兌爲委。噬嗑
賁。則震艮合離而火之諸象始著。剝復則又震艮合
坤。與謙豫異。彼之陽在三四。而含於陰。此之陽在初
上。貫坤體之終始矣。无妄大畜則震艮合乾。爲乾體
之起止矣。乾坤者坎離之本也。頤則震艮合。爲乾中
有坤。象離。大過則巽兌合。爲坤中有乾。象坎。故重坎
重離見。而其體成。乾坤體之純。坎離體之中。中居上
下之介。天地之所以開人也。下篇首咸恆。人道之經。
陽統陰而震艮用事。遯大壯。陽之本。乾以倡也。晉明
夷。陰之依坤以和也。陽仍舉震艮。而陰取離者。陽之

用在外。陰之用在中也。繼以家人睽而三陰具。繼以蹇解而三陽具。陰前陽後。陰固在陽範圍之內也。遯大壯與无妄大畜異。彼承剝復之運。陽從乾而先起。後止。此繼咸恆之次。陽從乾而先止。後動。長陽動於外。陽倡之義得矣。蹇解與屯蒙異。彼言序。長中少以次而出。此言位。少中長以次而上。長陽位於上。範圍之道立矣。咸恆易爲損益。人道之權。陰佐陽而巽兌用事。夬姤萃升困井革鼎。上下皆巽兌而具乾坤坎離之體。蓋以偏陰而包正也。彼小畜履爲陰之依乾以出。臨觀爲陰之依坤以成。家人睽亦祇三陰之具。

體與此異也。夫偏陰包正。其輔正歟。陵正歟。未可知也。惟正盡道。羣思輔之。孰敢陵之。苟其失道。始雖輔之。終且陵之。卽始終一節之佐。亦以責難爲義。而欲正之。自盡其道也。次以震艮。偏陽之本體。漸歸妹豐旅。則陽與陰合而歸於陰之中也。巽兌偏陰之本體。渙節則陰與陽合而歸於陽之中也。夫四正與四偏異。乾坤而泰否。坎離而旣未。由體以達用也。先之以咸。恆重之以損益。而後本體見焉。由用以反體也。由用反體。戒妄交之失也。漸歸妹與隨蠱異。彼則長陽下藏。少陽上止。尚無交義。此則長陰有待。少陰自歸。

爲交之窮也。豐旅與噬嗑賁異。彼則離之餘氣。此取離之中也。渙節與困井異。彼則坎包於陰。此取坎之中也。坎離者震艮巽兌之主也。中孚小過似與頤大過同。而亦有異。彼陽居先。此陰居先也。中孚象大離。小過象大坎。故終以旣未。始以四偏之交。終以坎離之交。由偏以合於中也。坎入離而復於乾。離入坎而復於坤。由中以底於純也。蓋人道終而爲天地之反原乎。

易經揆一卷十四

臣梁錫璵集傳

雜卦傳

雜卦者。於序而雜之也。序卦似變乎犧而未始少異。雜卦似變乎文而未始相岐。蓋易者變也。有序無雜。不足以盡變也。析渾淪之體而有序。主於分。分則判。上下而爲二。泯相受之次而爲雜。主於合。合則統。前後而爲一。乃雜卦仍首乾坤。三十卦後仍爲咸恆。是前後之次猶存上下之界也。序卦乾坤體之純。爲上篇之首。坎離體之中。爲上篇之尾。震艮巽兌體之偏。不能爲下篇之首尾矣。兌艮合爲咸。震巽合爲恆。補

其偏而幾於中。斯爲首。坎離合爲既未。充其中而幾於純。斯爲尾。貴純而取中也。雜卦乾坤首前。離坎居後。而包震艮兌巽亦貴純而取中也。序卦乾坤十卦後交爲泰否。雜卦易以損益。天道卽人事也。序卦咸恆十卦後翻爲損益。雜卦於八卦後易以否泰。人事亦天道也。序卦坎離既未遙相對而各爲尾。體用之分也。雜卦則近相踵而同居後。體用之合也。序卦乾坤坎離以陰陽爲次。震艮巽兌以長幼爲次。雜卦於乾坤之純震艮之陽仍其次。巽兌皆陰則曰兌見而巽伏。坎離非純則曰離上而坎下矣。序卦之在上者

雜卦雜於前而雜於下者十二卦。序卦之在下者雜卦雜於後而雜於上者十二卦。前則兌巽與比師大畜无妄井困八卦翻其次。後則離坎與解蹇睽家人否泰大壯遯大有同人小過中孚十四卦翻其次。蓋師之翻爲比比之生爲小畜。序卦以相受爲義也。師既可翻爲比比亦可翻爲師。雜卦以交互爲義也。而他卦之翻其次者視此矣。第前則方變翻其次者八卦。後則漸變翻其次者十四卦。後之末則變之極大過以下八卦。且不以交互爲對而參差不對矣。乃雜之義云何。乾坤至屯蒙發陰陽之端也。震艮至井困

著陰陽之用也。咸恆至離坎。明陰陽之交也。小畜履至夬。究陰陽之變也。乾剛坤柔爲始。比師則坎得乾之中剛而居二五之中位。臨則初二皆剛而二有本。觀則五上皆剛而五有終。蓋兌巽之佐坎。屯蒙則震艮隨坎以出而三剛全矣。其端既具。其用斯行。震起艮止。卽乾之起止也。損益則艮震合兌巽。大畜无妄則艮震合乾。萃升則兌巽合坤。謙豫則艮震合坤。噬嗑賁則震艮合離。離者陰之中。陽之起止歸於陰之中而已。兌見巽伏。卽坤之見伏也。隨蠱則兌巽合震。艮剝復亦艮震合坤。晉明夷則離合坤。井困則巽兌

合坎。坎者陽之中。陰之見伏歸於陽之中而已。其用既著。其交自洽。彼損益隨蠱。雖皆震艮巽兌之合。不足言交也。正交者其咸恆乎。而乾坤之起止見伏。胥具此矣。故十卦而爲否泰。乾坤既交。則乾中有坤。坤中有乾。故又十二卦而爲離坎也。渙節則坎合巽兌。蓋陰陽之端。坎爲先。故陰陽之交。坎爲主。解蹇亦三男之具體。而乾體全。睽家人則三女之具體。而坤體全。故合爲否泰。繼此則陽衰陰盛。大壯遯亦震艮合乾。大有同人則離合乾。革鼎亦三女之具體。中陰不待陽而自立矣。小過中孚則震艮巽兌之分體。偏陰

亦不待陽而自立矣。豐旅則離合震艮。蓋離為主矣。離上坎下而陰陽互藏於中。過中必變也。始之比師。則坎之中陽始見於坤。臨觀則兌巽之偏陰從之。其時陽主而陰輔。末之小畜履則巽兌之偏陰上合於乾。需訟則坎之中陽從之。其時陰壯而陽窮。故巽兌合爲大過而顛。然原其禍始於巽。治之在反其道而姤。夫爲其關。始姤而終夬。斯變而不失其正矣。序卦終以旣未而復於乾坤。始以乾坤終以乾坤者。反本之義也。反本則用不匱。雜卦終於夬。夬上卽爲乾。始以乾終以乾者。循環之義也。循環則運不息。

乾剛坤柔

乾坤爲剛柔之純。故曰易之門。他卦皆其所出也。爲剛柔之綜。故曰易之緼。他卦皆其所體也。

比樂師憂

四海仰一人。道可大行。故樂。一人統三軍。安危所繫。故憂。

臨觀之義或與或求

臨陽浸長。我似無與而有與之義。故初二言咸。無心之感也。觀陽向消。物似無求而有求之義。故五上言生。不言之化也。

屯見而不失其居蒙雜而著

陽動故見由初升五則得位而不失其居陽陷爲雜由二達上則不揜而著

震起也艮止也

起者靜極而動化機發舒之端乎止者動極而靜化機歸結之候乎

損益盛衰之始也

損下未卽衰然傷其本則衰之始益下未卽盛然培其基則盛之始

大畜時也无妄災也

適其會。健可止。故言時。非倖致也。德雖脩。遇難必。故言災。非自取也。

萃聚而升不來也

澤性浸。雖居上。猶依地而能聚。木性散。雖居下。將出土而不來。

謙輕而豫怠也

自卑故輕。已樂故怠。

噬嗑食也賁无色也

噬嗑以去間。如有物而見食也。非間曷去。賁以文質。以无色而受采也。非質無文。

兌見而巽伏也

陽道貫於終始。故曰起曰止。陰道隨時出入。故曰見曰伏。

隨无故也。蠱則飭也。

隨前无故。妄作必凶。蠱後當飭。失機莫救。

剝爛也。復反也。

陰害極而必爛。陽德窮而能反。

晉晝也。明夷誅也。

晝天道也。誅人事也。錯舉之互文也。

井通而困相遇也。

巽下入而坎出其上。故通。兌下塞而坎處其下。故遇。遇者相抵而不通也。

咸速也恆久也

情本自具而無心。故速。理出自然而有方。故久。

渙離也節止也

風散水。故離。澤防水。故止。

解緩也蹇難也

解則勢已寬。故緩。蹇則時方急。故難。

睽外也家人內也

志不同行。則離。位既得正。自合。外內。猶云外之內之。

也。

否泰反其類也。

乾坤體之全。否泰用之全。否泰相反。不可一端盡。故言類。

大壯則止。遯則退也。

盛必慮危。宜止。消貴知幾。宜退。雜卦三言止而義不同。起而止。循環之義。離而止。防閑之道。此則戒慎之意。可進而不輕進也。

大有衆也。同人親也。

有能兼上下。故衆同。則合彼此。故親。

革去故也鼎取新也

金代火爲去故木鑽火爲取新

小過過也中孚信也

過而小則謂之過孚在中能有其信

豐多故也親寡旅也

豐則孽牙之伏不一故多故旅則洽比之情不固故

親寡

離上而坎下也

乾上坤下陰陽之定體如人之首上而腹下離上坎下陰陽之互藏如人之心上而腎下子時腎精升而

爲氣。陰中之陽。午時心氣降而爲液。陽中之陰。水火所以既濟也。言剛柔而乾坤之體具。而諸卦之體亦具。言上下而坎離之用著。而諸卦之用亦著。蓋體不過一陰一陽。用不外一升一降。

小畜寡也。履不處也。

一柔當乾之衝。力難獨制。寡也。一柔居乾之後。順而從之。不處也。

需不進也。訟不親也。

乾居坎後。有待而不進。乾行坎上。相違而不親。

大過顛也。姤遇也。柔遇剛也。漸女歸待男行也。頤養正。

也既濟定也歸妹女之終也未濟男之窮也夬夬也剛決柔也君子道長小人道憂也

大過本末弱而顛窮本知末宜有道以御之矣柔初生勢必遇剛而爲姤然女在外究難自歸必待男行而爲漸惟陽足統陰而養正如頤者得其道矣則陰陽得位而定如既濟者是其效矣倘如歸妹之女少自歸而爲女之終將至未濟之三剛失陷而爲男之窮夫苟自反其剛而積盛爲夬則柔遇剛者轉爲剛決柔矣陰助陽象以女害陽象以小人易女而言小人恐玩其柔而忘其害也泰陽內充小人自化曰消

夫陽上盛。小人自誑。曰憂不爲已甚也。其要惟在自治。故皆曰君子道長。長則爲乾矣。